

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : BUKAN LISAN

**DARIPADA : DATUK DR. HASSAN BIN BAHROM
[TAMPIN]**

SOALAN

Minta **PERDANA MENTERI** menyatakan pelan penstrukturran FELDA melalui cadangan Jawatankuasa Khas FELDA yang telah ditubuhkan. Sejauh mana pelan tersebut dilaksanakan dan bagaimana ia telah memberi manfaat kepada peneroka FELDA.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Laporan Pelan Pemulihan FELDA hasil daripada Pasukan Khas Untuk Menangani Isu FELDA yang dipengerusikan oleh YBhg. Tan Sri Abdul Wahid Omar telah dibentangkan dan dipersetujui oleh Jemaah Menteri pada 14 Oktober 2021. Pasukan khas telah menggariskan beberapa cadangan penyelesaian antaranya seperti berikut:

- (i) mengurangkan tanggungan hutang FELDA;
- (ii) meningkatkan pendapatan teras dari tanah ladang FELDA melalui peningkatan pegangan FELDA dalam FGV Holdings Berhad (FGV);

- (iii) meningkatkan daya berdikari dan mengurangkan jumlah pinjaman peneroka;
- (iv) mengoptimumkan pengurusan operasi FELDA; dan
- (v) mentransformasi pengurusan kewangan dan tadbir urus korporat FELDA.

2. Susulan itu, Kerajaan telah bersetuju dengan penerbitan gabungan sukuk dan kemudahan kredit pusingan berjaminan Kerajaan dengan had RM9.9 bilion bagi membiayai pengambilalihan FGV berjumlah RM3.9 bilion dan pengurangan hutang FELDA kepada Maybank dan Kumpulan Wang Simpanan Pekerja (KWSP) berjumlah RM6 bilion. Sehingga kini, FELDA telah menerbitkan sukuk berjaminan Kerajaan berjumlah RM2.185 bilion. Penggunaan kemudahan kredit pusingan dijangka dibuat pada Mei 2022.

3. Sehingga November 2021, FELDA beserta pihak yang berkepentingan sama secara kolektif (PACs) telah menguasai 81.8% pegangan saham FGV. Peningkatan pegangan saham FGV ini secara langsung meningkatkan sumber pendapatan teras FELDA. Sementara itu, FELDA juga telah menyelesaikan pinjaman dengan Maybank berjumlah RM2.0 bilion pada Mac 2021. Melalui pembiayaan semula pinjaman tersebut, FELDA akan menjimatkan bayaran pinjaman berjumlah RM955.11 juta untuk tempoh 3 tahun iaitu antara tahun 2021 hingga 2023.

4. Bagi meningkatkan daya berdikari dan mengurangkan jumlah pinjaman peneroka, beberapa inisiatif utama telah dilaksanakan seperti berikut:

- (i) menggunakan sistem *Smart Plantation Management Solutions* (SPMS) dalam operasi perladangan. SPMS membolehkan aspek pemetaan dirian sawit, pengurusan inventori ladang dan pemantauan terhadap tahap kesihatan tanaman dapat dilaksanakan secara efektif, sekaligus menyumbang kepada peningkatan hasil sawit peneroka sehingga 2.9 tan/ hektar

setahun, berbanding kira-kira 2.2 tan/ hektar pada masa kini; dan

- (ii) pelaksanaan Program Pembangunan Peneroka (PPP) yang menyediakan geran dan pinjaman kepada peneroka dan koperasi peneroka untuk menceburi bidang pertanian atau ternakan bagi menjana pendapatan tambahan. Perserta PPP berpeluang menjana pendapatan tambahan kira-kira RM500 sebulan atau terimaan dividen kira-kira RM1,000 setahun bagi penyertaan melalui koperasi peneroka. Antara aktiviti pertanian atau ternakan yang dijalankan termasuk tanaman cili secara fertigasi, halia muda, ternakan arnab pedaging, tanaman herba, ternakan lembu pedaging dan tanaman jagung bijirin. Sehingga November 2021, 6,597 projek PPP melibatkan 52,368 peneroka telah diluluskan melibatkan bantuan kewangan berjumlah RM130 juta.

5. Bagi mengoptimumkan pengurusan operasi, FELDA sedang membuat kajian penstrukturkan semula pengurusan ladang di 317 tanah rancangan bagi meningkatkan kecekapan operasi. Selain itu, FELDA juga telah berjaya menerbitkan penyata kewangan tahun 2020 dalam tempoh 4 bulan selepas tahun kewangan berakhir. Pencapaian tersebut amat menggalakkan berbanding tempoh 14 bulan yang diperlukan bagi menerbitkan penyata kewangan tahun 2019. FELDA mensasarkan penerbitan penyata kewangan tahun 2021 dalam tempoh 2 bulan sahaja selepas tahun kewangan berakhir. Pencapaian ini merupakan salah satu usaha berterusan ke arah mentransformasi pengurusan kewangan dan tadbir urus korporat FELDA.

6. Kesemua pelaksanaan inisiatif ini dipantau oleh Jawatankuasa Pemantauan Pelan Pemulihan FELDA yang turut dipengerusikan oleh YBhg. Tan Sri Abdul Wahid Omar. Jawatankuasa ini yang bermesyuarat setiap 2 bulan akan memantau dengan teliti kemajuan setiap inisiatif yang dilaksanakan disamping membuat perbandingan dengan amalan terbaik industri bagi menambah baik pelaksanaan insiatif.

Sekian, terima kasih.